

Напалкова Татьяна Александровна

Ылі грездын госьтитом

Ылын-ылын, войвылын, сулаліс неыджыд грезд. Сөмын кызь вит керка чурвидзисны мыльк йылын. Тайө грездас олісны Ванялөн пөч-пөльыс. Вунөдіс нин Ванюш, кор бөрьясыс воліс на дінө. Кор батыс петкөдліс поезд вылө билетяс, сьолөмыс босьтчис тіпкыны өдйөджык. Көть ичөт на сійө вөлі, но зэв шоныда казтывліс бөрьясыс рөдвуж дорө ветлөмсө.

Со и көрт туй станция! Ванюшлөн юрыс бергалө отарө-мөдарө, ставсө окота видзөдлыны. Абу дивө, өд сійө медводдзаыс мунө отнас сэтшөм ылө. Машинист сетіс гудөк, и ставөн заводитісны кутчысылыны. Детинка пырис вагонө да кутіс мөвпавны пөч-пөль йылысь.

Дас час поездын колісны өдйө, и со грездса ичөтик станция. Ваня босьтис чемодан да мөдөдчис петны. Эз удит лэдзны коксө, кыз сійөс кодкө меліа топөдіс. Тайө вөлі Оксинь пөч. Сійө нюмьяліс да век на эз эскы, мый отка внук локтіс дзонь куим вежон кежлө.

Медводдза вежоннас Ваня төдмасис грездыскөд, выль йөзкөд, отсасис пөчлы дөзбөритны мөскөс, пөльлы – пыртлыны ва.

Өти рытө Петыр пөль шуис, мый сылы колө кайлыны вөр керкаас, видзөдлыны, ставыс-ө лючки-ладнө. Ванюшлөн югзисны синьясыс: сійө некор на эз вөвлы вөр керкаын! Дыр низгис пөльыслы, и со найө вөсылалөны орччөн. Кутшөм мича вөрыс водз асывнас: лысваыс пөртмасьө шонді улын, пашкыр лапьяса дзор коз, быттьө көзян, видзөдө ставныс вылө енэж дорсянь. А дукуыс! Юрыд кольмө!

Воисны вөр керка дорө. Ваня тэрмасьөмөн кутчысис өдзөс вугйө да көсйис пырны, но пөльыс эз лэдз тайөс вөчнысө.

- Пөльө, мый лоис?

- Ваня, тэ өмөй он төд, мый медводз колө таркөдчыны?

- Мыйла? Сэні некод абу.

- Кызди абу? А коді дөзъоритө керкасө, кор ми абуось? Медводз миянлы колө таркөдчыны да чолөмавны вөрсаөс, тадзи ми сетам сылы төдны, мый локтисны көзьяиньяс. Сэссия колө таркөдыштны быд пельөсө, медым став лёкыс петас керкаысь.

- Пөльө, кытысь тэ төдан тайө?

- Коркө важөн менө велөдіс батьөй, а сійөс – сылөн батыс. Гөгөрвоин?

-Да. А эмось нөшта татшөм обычайяс?

-Эм, но висьтала неуна бөрынджык, өні миянлы колө уджыштны.

Петыр пөль да Ваня лунтыр «дөмисны» вөр керка вевт, новлісны кос пес, вөчисны выль лабичьяс. Сэссия пөль пузьөдіс бипур дорын тшай, перйис сёян, кодөс сетіс Оксинь пөч. Кутшөм азыма сёйсьө бура уджалөм бөрад!

Но Ванялөн эз вун, мый пөльыс көсйысис висьтавны вөрса обычайяс йылысь, да сійө пыр юасис. Петыр пөль бурджыка пуксис мыр вылө, матыстис пөсь тшайсө да, тшын вылө видзөдігмоз, босьтчис висьтавны.

- Важысянь коми йөз нималөны бур кыйсьысьясөн да вөралысьясөн. Коми муад суйөр сайсянь волісны купечьяс, медым ньөбавны дона куяс. Вөрө петтөдз эз позь юасыны, кытчө муно вөралысь, медым эз вомдзась кыйдөсыс. Вөравны мужичөйяс мунліны сөстөм паськөмөн, няйт көлуйөн эз позь пырны вөрад. Нывбабаяс некор эз чышкавны верөс бөрсяыс туйсө, сы вөсна мый вөралысь вермис вошны вөрын. Быд семьялөн эм аслас угоддьө, кытчө некор оз пырны мукөд йөз. Сійөс позьө төдмавны быд котырлөн аслыссикас пас серти. Весиг бокті мунигөн кө аддзан лэчкысь пөткаөс ли, урөс ли – вөрөдны оз позь. Бураа кыйсьөм бөрын быть колө неуна кольыштны вөрсалы, он кө – вермас скөрмыны, да мөдысь вөралөмыд оз артмы. Суис кө тэнө вой, верман пырны быд керкаө, сөмын эн вунөд: кымын пес видзин, колө вөчны кык пөв унджык.

- А чери кыйигөн татшөм жө законьясыс?

- Дерт. Медводдза черитө век колө сетны бөр васалы. Таысь өтдор, колө пестыны бипур, кытөн сотны дөра, стеклө. Чайтсьө, мый тадзи кыйсьысьяс вөчөны васалы козин.

Дыр на вермис висътавны коми йӧзлӧн олӧм йылысь Петыр пӧль, но пуксьысь шонді петкӧдліс, мый колӧ мӧдӧдчыны гортӧ. Ваня чеччис аслас мыр вылысь, сылӧн син улас усис няньтор, кодӧ колис пажнайтӧм бӧрын. Сійӧ которӧн усъкӧдчис вӧр керкалань. Петыр пӧль видзӧдіс сы вылӧ да эз гӧгӧрво, кытчӧ муніс внукуыс. Ваня пуктіс няньсӧ ӧдзӧс дорас да аттьӧалис вӧрсаӧс. Петыр пӧль нюмъӧвтис да шуис:

- Бура тай тэныд коми обычайяс йылысь висътавсьӧма. Молодеч, Ванюшка! А гортӧ локтӧм бӧрын пӧчыл мойдыштас кӧлысь да нывбабаяслӧн оласног йылысь.

Куим вежоныд ӧдйӧ колис. Выль тӧдӧмлунъясӧн Ваня муніс карӧ, кӧні окотапырысь висътавліс коми йӧз йылысь аслас ӧртъяслы.